

VJii Productions AG – Gewinner InnoPrix SoBa 2011:

Laudatio von Kurt Schaad

Mini Damen und Herre, ich freue mich sehr und s'isch mir en Ehr, dass ich da in Solothurn d' Laudatio für en Priisträger vom Innoprix SoBa halte törf. Ich freue mich, will di priiskrönti Firma us dem Umfeld chunnt, wonich sit bald 40 Jahr tätig bin, ich freu mich, will d' Jury sich hät überzüüge loo, das me mit guet verzellte Gschichte cha nachhaltigs Wachstum schaffe und ich freue mich au, wil hinder däm Innovationspriis ä Bank staht.

Verschiedeni Banke händ i de letschte Jahr grossi Aaschtrenigige undernoo, us Geld, mit fremdem Geld, no meh Geld z'mache, was denn widerum vilne Schlaumeier vil Geld i di eigete Portmonee gspüelt hät, was aber eigentlich nid innovativ und scho gar nid nachhaltig gsii isch. Si händ Geld als Selbstzweck pruucht und nid als Schmiermittel für ä produktivi Realwirtschaft, was jo eigentlich in erschter Linie d'Idee vomene nachhaltige Bankwese sötti sii. Drum freu ich mich, das mit em InnoPrix SoBa ä Bank scho sit bald 25 Jahr Geld zur Verfügung stellt, wo demit innovativs und nachhaltigs Gschäfte uuszeichnet wird.

Und zum erschte Mol wird jetzt ä Firma uuszeichnet, wo mit elektronisch bewegte Bilder im Dotcom-Beriich vo de digitale Welt dihei isch. En Beriich,

wo i de letschte Jahrzehnt, grad wege de Digitalisierig, enere ständige Veränderig uusgesetzt isch.

Wonich am Aafang vo minere Fernsehkarriere min erschte weltbewegende Biitrag fürs Schwiizer Fernseh realisiert ha, Längi 1 Minute 25 Sekunde, wo scho wäred de Uusstrahlig i Vergässeheit grote isch, wonich dä Biitrag gmacht ha, hät de Kameramaa ä Filmkamera gha woner nach 12 Minute filme hät müese de Film imene schwarze, liechtdichte Sack uswechsle. De Tonopérateur hät mit eme separate Tonbandgrät dä Ton ufgnoh, im Schniidruum hät me Bild und Ton zerscht müese synchronisiere, gschnitte hätt me mechanisch, mit de Schär, und uf em Filmstreife hät me die einzelne Bildli gseh. Hüt werded die Bildli, zäme mit em Ton, nid emol me ufere 60 minütige Band-Kasette, sondern ufeme Chip iner HD-Kamera digital ufzeichnet. De Chip chame den inen Lämpop stecke, wone Schnittprogramm-Software hät, und so chönd hüt Biitrag innert chürzeschter Ziit fertiggschellt werde. Alles isch, wege de Digitalisierig, chliiner und massiv billiger worde. Ä rasanti Entwicklig, wo no lang nid a ihrem Endi aacho isch. Früener hät de Storch d'Babys procht, hüt sind die chliine Computerkids de Meinig, me chön si im Internet abelade.

Die Entwicklig hät neue Umsetzige, neui Produkt und au neui Prüf mit sich procht. So isch zum Biispil de Pruef vom Videojournalischt entstande, en

Pruef, was kein Kameramaa und kein Cutter me brucht, will de Journalischt selber d'Kamera füert und aschläüssend au no grad selber schniide tuet.

Eine vo de beide Priisträger isch emol sonen Videojournalischt gsii, biser irgendwann emol s'Gfüel ghaa hät, sich müese selbständig z'mache und en eigei Firma gründet hät. Sin Partner, woner de Priis mitem teilt, hät au en eigei Firma, en Online-Agentur und irgendwann händ sich die beide gfunde und sind drufcho, ihri beide Chernkompetenze im Dezember 09 inere neue AG zämez'füere. Das, was sie mached heisst denn uf guet Schwiizertütsch: Corporate Web-TV-Productions. Was praktisch heisst: Firme und iri Produkt im Internet mit Videobiitrag emene Ziilpublikum nöcher bringe, notabene mit Videobiitrag, wone interessant Gschicht verzelled. Es Gschäftsmodell, was i de Schwiiz eso nonig gäh hät und wo sich en Märkt defür zerscht no hät müese uftue.

Da hämer also zwei Undernämer, wo en feschte Glaube a sonen Märkt händ, wo ihres eigei Geld riskiered und investiered, wone positivi Zuekunft gsehnd, inere Wält, wo em Undernämertum nid grad en rote Teppich uusbreite tuet. E Welt, wo mitere Vollcascomentalität alles und jedes mues absicheret sii, wome ja kei Fehler mache törf, wo de Handschlag nüt me gilt, wo Problem nümme vo Chef zu Chef glöst werded. Sondern wo Chefe d'Problemlösig a ihri Jurischte delegiered und wo dodemit d'Problem erscht richtig aafanged. Und das alles umgäh vonere Gsellschaft, wo i de Tendenz

de Schlaumeier Vorbildfunktion hät, wo de Egoismus Lebesinhalt isch und wo de Gmeinsinn immer meh a Wert verlürt.

I sonere Ziit isch Undernämertum psunders wichtig, wo Undernämer, wie üseri beide Priisträger sich mit vil Enthusiasmus für ihri Gschäftsideo iisetzed, es Risiko nämend, ohne sich rundume abz'sichere, Chunde findend, wo übers Internet kommuniziere wänd und wo gsehnd, das me mit bewegte Bilder vil meh Lüüt erreiche chan. Und dänn mues me de Chund no devo überzüüge, das es Hochglanzvideo mit ere schönfärberisch sandgschtrahlete Botschaft, wo alles nume super isch, eigentlich nid vil bringt und das me mit ere guet verzellte Gschicht übers Unernehme, ä Gschicht wo Egge und Kante hät, wos Läbe ungschminkt aber mit eme positive Grundzug zeigt, das sone Gschicht vil authentischer und wegedem ebe au chundefründlicher isch. Und denn mues me au no erkläre, das ei einzigi Gschicht im Web niemerdem öppis nützt, sondern dass erscht ä ganzi Fortsetzig vo Gschichte über en bestimmte Ziitruum Ufmerksamkeit bringend und me drum nid ei einzigi Gschicht cha pschtelle, sondern es Abonnement für mehreri Folge: vo dem mues me de Chund überzüüge und dä mues gseh, dass söttigi Gschichte Emotione wecked, wo für sini Firma und sini Produkt positivi Gfüel erzüged.

Und tatsächlich, söttigi Chunde gits und es sind ganz schnell scho zimli vil und so cha dä Start-up wachse und Arbeitsplätz schaffe und chunnt so i d'Chränz für de Innoprix SoBa.

Aber wie präsentiert me dä spezielli Business-Case enere strenge Jury, wo bis jetzt meh Produkt zum aalange hät müese beurteile? Indem me mit de Jury ebe grad sone Gschicht 1 : 1 videomässig produziert, d'Jury s'Produkt eso grad direkt erlebe cha. Und unterschtedet sie de Jury nid, si hebed de Priis nu vergeh, wil sie sich selber am Bildschirm gseh händ. Es sind jo schliesslich kei Politiker. D'Jury hät vor allem au die lange Lischte vo namhafte Chunde gseh, aagfange vo Alpiq über Migros bis Swisscom, wo de sichtbari Erfolgsuuswis vo dem no junge Undernehme isch. Wo zwei Undernämer sich voll driichnüündled im Wüsse drum, das nüt so sicher isch i de Wirtschaft, wie d'Veränderig und das gilt i dem Beriich, wo si tätig sind, psunders tütlich. Sie nämmed die Useforderig aa, händ drum au en ächte Vorbildcharakter und werded drum mit Recht hüt Zobed geehrt.

Herzliche Gratulation.